

For di tres aña pasa a cuminsa proceso pa cambia 5 florin



Jane Semeleer, director ejecutivo di operacion di Banco Central di Aruba, den conferencia di prensa ayera mainta a splica cu e cambio di cinco florin no ta cos cu nan a traha riba dje ayera, sino ta un proceso cu ta andando caba pa algun tempo.

E proceso a cuminsa for di 3 aña pasa.

E motibo tras di e cambio aki ta cu un dado momento falsificacion di e cinco florin cuadra a cuminsa aumenta y e calidad di e monedanan falsifica tabata mehorando.

Esey a causa cu algun comerciante no tabata kier a acepta e cinco florin vierkant y e publico tabata cuminsa sintie incomodo cu e cinco florin, cual tabata un reflejo di desconfiansa. Y pa Banco Central esey tabata inaceptabel.

Na cuminsa, segun Semeleer, BC a nota cu tin cinco florin falso den circulacion, esta na 2000, sin cu a haci denuncia oficial na Polis. Y nan a cuminsa hiba un campaña di informacion fuerte pa conscientisa e publico riba e diferente elementonan di seguridad =, p'asina por distingui entre e cinco florin falso y esun autentico. BC su meta tabata pa mantene e cinco florin vierkant hibando un campaña di informacion.

Pero lamentablemente durante añanan cu a pasa tabatin varios caso di falsificacion y

cada biaha e falsificadornan a logra mehora e moneda falso.

Na Banco Central a yega un total di 2900 moneda falso.

Tambe Polis a registra diferente caso di falsificacion y tin un cantidad no conoci cu ta sigui circula den e economia. Semeleer a enfatisa cu tur caso di falsificacion ta hopi serio y ta castigabel pa ley, pero si compara e cantidad di placa falsifica cu e cantidad di 5 florin den circulacion, e parti di falsificacion ta keda toch marginal.

Sin embargo Banco Central a haya e casonan di falsificacion demasiado serio, y a tuma contacto cu Koninklijke Nederlandse Munt na Hulanda, cual ta e compania cu ta traha e monedanan di florin pa Aruba, pa conseha Banco Central riba cambio di e cinco florin vierkant existente.

A scohe pa mantene e diseño di cinco florin existente pa tres motibo:

1) e diseño existente ainda ta hopi gusta, y e cambio lo no ta hopi grandi; 2) e proceso di bini cu un diseño completamente nobo lo tuma hopi mas tempo; 3) ta mas economico pa mantene e diseño di moneda cu produci un completamente nobo.

Despues di e prome combersacion cu e empresa ariba menciona, a bini cu diferente proposicion. A envolvi Evelino Fingal den e proceso aki y pesey Banco Central ta

masha agradecido na dje pa su contribucion.



Na inicio di 2004 BC a aproba e ultimo diseño y na maart 2005 Parlamento di Aruba a aproba e cambio di e cinco florin vierkant pa esun nobo rondo. Contrario na circulacion di placa di papel, cual Banco Central ta completamente responsabel pe y ta doño di nan, e circulacion

di moneda Banco ta hacie den nomber di Gobierno di Aruba.

Pesey e cambio di 5 florin mester a wordo aproba dor di Gobierno y Parlamento. Despues di e aprobacion a laga produci e cinco florin nobo y na juli ultimo nan a yega Aruba.